



12. september 2008

Inatsisartut Forretningsorden-iani § 36 imm. 1 tunngavigalugu Naalakkersuisunut apeqquteqaatit makkua apeqquteqaatiginiarpakka:

Ajutoorsimasumut Rita Christensen-imut tunngatillugu kiisalu tassunga tunngatillugu Namminersornerullutik Oqartussat tamatuminnga suliarinnissinerannut tunngatillugu Naalakkersuisunut apeqquteqaat.

(Inatsisartunut ilaasortaq Palle Christiansen, Demokraatit)

Tunngavigisaq

Maannakkut siullerpaallugu oqaatigereerlara sulianut suliaralugit ingerlanneqartunut politikkikut akulerunnissaq akkerilluinnartuugalarakku, kisiannili suliap matuma suliarineqarnerata uparuarneqartariaqarlunnarnera pissutigalugu allatut ajornartumik Naalakkersuisunut toqqaanartumik apeqquteqaateqarniarlunga aalajangerpunga kiisalu Rita Christensen-imut Sisimiuneersumut tunngatillugu suliarinnissimanermut tunngatillugu paasissutissanik tunineqarnissannik qinnuteqarusuppunga.

Neriuutigaara Naalakkersuisut apeqquteqaatit makkua pimoorulluinnarlugit tigussagaat, kiisalu tigungeriniit sapaatip akunnerata iluani akissuteqaatinik suliaqariissasut, tassami naluneqannigitsutut Rita Christensen ungasinngitsunnguakku Sisimiunut angerlarluni tikittussaavoq. Kisiannili Namminersornerullutik Oqartussat pisariaqartinneqartunut tunngatillugu suli aalajangiusaqarsi-mannginnerat pissutigalugu ilaqutariit Christensen-ikkut panitsik ajoqusernikoq nammineerlutik tikisittussanngorpaat, tamatumalu kingunerisaanik pisariaqartitaanik ikiorsertussanngussallugu, taamaammallu tamakkua tunngavigalugit suliassap ingerlannerliorneqarsimaneranut akisussaaffiup inissinnissaa tamaviaarlunga sulissutiginiarpara, taamatullu politikkikkut pikorliorneq suliassamik akisussaasumut inissikkusullugu.

Suliamut tunngatillugu annertunerusumik paasisaqarnissara siunertaralugu paasissutissanik annertunerusunik pissarsinissamut akuerineqarsinnaanissara Rita Christensen-imut ilaqutaanullu apeqqutigisimavara, taakkualu akuerisimavaannga.

Qulaani pineqartut tunngavigalugit apeqquteqaatiginiakkama makkua akissuteqarfigineqarnissaat kissaatigaara:

1. Ullumikkut Rita Christensen-imut tunngatillugu suliaq qanoq inissisimava?
2. Suliap pineqartup taama arriisaarunneqartigisumik suliarineqarsimaneranut sunamitaava pissutaava?
 - a) Suliassap pineqartup taama arriisaarunneqartigisumik suliarineqarsimanera Naalakkersuisut toqqissisimanartutut isiginerlugu?



3. Naalakkersuisut Rita Christensen-imut ilaqutaanullu Kalaallit-nunaanni najugaqavissunut tunngatillugu ikiorsiivigineqarnissamik pisariaqartitsinerisa nalornissutigineqarnera qaamatini arfineq-marlunni ilisimareersimanerlugu?
4. Kalaallit-nunaanni pisortat illuutaasa innarluutilinnik atorneqarsinnaannissaannik piumas-aqaatit tunngavigalugit naleqqussaanermi Naalakkersuisut suliaqalereersimanerlutik. Matumani aammattaaq issiavinnik assakaasulinnik atuisut eqqarsaatigalugit.
5. Naalakkersuisut pisortatut akisussaasutut suliassani taamaattuni qanoq inissisimassanersut pillugit najoqqutassanik peqareernerlutik, soorlu assersuutigalugu apeqqutini taamaattuni Namminersornerullutik Oqartussat akisussaaftii erseqqissuussapput paatsuungassutigineqassanatillu.
6. Naalakkersuisut pilersaarutiginerlugu innuttaasut qitornaminnik nunarsuarmut avammut aallartitsinnginnerminni ilaqutariittut sillimmasiinnikkut pisariaqartinneqartutigut piumasarineqartutigullu ilitsersuutinik nutarterinissaq, tamakkuami ilaqutariit qitornaminnik aallartitsisinnagit isumannaarnqartariaqarmata, kiisalu Naalakkersuisut tullianik Kalaallit-nunaanni najugaqavissumik nunanut allanut aallartitsinissaq sioqqullugu ajoquseratarsinnaanissamut tunngatillugu qanoq iliortoqassanersoq qanoq pilersaarusiussanersut apeqqutigineqassaaq?
7. Siunissami taamatut pisoqassagaluarpat aamma Naalakkersuisut taama kigalatigisumik sulissanerlutik aalajangerumaataartigissanerlutillu, soorlu Naalakkersuisooqatigiinnermi Inatsisartunut ilaasortaasoq imaluunniit Naalakkersuisooqatigiinni Inatsisartuni ilaasortap ilaqutaa matumani pineqaraluarpat?